



# Der Medwescher **TRAMTER**

Det Saksesch Bliëd der Medwescher Himetgeminschuft

Nr. 26 äm 13. Johr

Bäluäch zem »Mediascher Infoblatt«

Nürnberg, äm Dezember 2017



Hellij Owend

Alle Zichnungen äm Bliëd  
se vum Wolfgang Untch

# Kurtsch Gedåñken af Noasaksesch

Läw Tramîterliëser,

båld heoche mir allen schiun wedder, wä e jêd Johr um Hellijen Owend, mih oder wenijer zesummegedronjgd, viur enem mih odder wenijer prächtich geschmäcktem Chrästbûm.

Norr ister kurtsch uëfgelinkt, äm es de Bech vuël ze schlön, uch drön nöchemol äm de Geschinker eos der Verpackung zereeßen, tästern, rëwen uch wäschen mir ängde wedder und ächtich uch verzäckt un easern Händys erämmmer. Fast schiun wä Aladin u senger Weangderlamp. Jeder mät sech uch sengem Händy. Geminsem elin viur'm Chrästbûm, awer mät dem gelawten Händy, äm dât sich hegtzedäch wärrlich fast schiun alles dreht ...

Et se nemi norr de jänger Generationen, dä süchtich dernô sen, nä uch mir Ealderen teanken uch floaën es de Ugen ständig durch des digital „Fake“-Wealt, äm cha näst uch noch esi eawichtijet ze verpassen. Kängt jö villicht wichtich sen! Derbä äs dä „Wealt“ do dertän esi mächtich uch afgeblösen, dat mir norr noch Iwwerschräften zwäschen millionen bunter Beldcher wohrniën. Mir märken guérnemi, dat mir glad derbä sen, det kritesch Dinken af dem Wiéch än des noa Zegt ze verlähsen.

Watt awer noch vill gefehrlicher äs, well alles esi griuß uch mächtich än deser digitalen Wealt erschengt, äs, dat mir ohne mih vill Nözedinken alles gliwen uch siguer färtich Mihnnungen iwwerniën. Dinken uch Nödinken äs mähsem uch Luxus well Zegtverschwändung, alsi nemi „in“ – mir konsumieren läwer, äs jo uch vill bequemer. Ifach norr noch emol iwwer't Händy wäschen, uch schiun bekit em fast alles serviert. Mir märke guer nemih wäe as Liëwen digitalisiert widd, wä der „Dschin“ eos Aladins Wangderlampe eas kontrolliert uch manipuliert.

Beviur mir drön än deser hïschchen, noaën Wealt um hellijen Owend mät wihen, mäden Fanjern än't Bät fallen, kenne mer zefridden sohn, datt der Owend „postfaktesch“ gesähn wedder emol hïsch wör!

Ir geat Legt! Losst et bitte net gladdesi färr kun! Losst den Gist der hellijen Nuëcht uch det Lächt der Kärzen än ir Härzen schengen. Mer wängschen allen vill Froad um WOHREN Liëwen, en besännlich Chrästzegt, alles Geadet äm Noaë Johr 2018 uch norr de Geseangd!



## Toleranz

Ech gliwen un de Toleranz,  
a'r net wä se de Wealt heg'd präddicht,  
mät diäm verdrehten Firlefanz  
die ären Wiërt belidicht.

Et äs wä mät e'm Sack vuëll Flih:  
Lässt em dä lius, friëß'se dich af!  
Des Worhít dit gor munch'em wih,  
äm dât dean dä är'n Däckel draf!

Zer Toleranz gehirt uch Meat  
sich sealwst ze respektieren,  
well norr mä'm Glüwen un det Geat  
sîl em sich net traktieren.

## Wie wīs wat morre kit?

Eos dem Bändchen: „Eos menger Ärevakanz“  
vum Schuster Dutz

En sealdän ījenschuft der Legd  
Äs de Zefriddenhit,  
Beseangders wonn de Wealt, wä hegde,  
Dreangder uch driwer giht.

Wis em, wat morre wid geschähn?  
Wat Iwer morre kit?  
Näst kån der Mäntscha äm viureos sähn,  
Wat nechstens würde wid.

Villicht kån em schiu morre fräh  
En Heos äm sonst bekun,  
Villicht hêt ennen derbä  
En gealdän Uhr noch un.

Villicht kost iwormorre schiu –  
Dât kån em hegt net sohn –  
En Ärbeskegd odder en Biuhn  
En virtel Million.

Villicht kån em schiu morren sähn,  
wonn et uch schwer wid gohn,  
Datt Klider bäs un Hals de Fräen  
Uch bäs än Ärren drohn.

Villicht schiun iwver morre gleich  
Kån et passieren draff,  
Gohn nacktich sää bäs un de Bech  
Am Korso uëf uch af.

Villicht, me Vulk, dat morren der  
De Schiul em schwämme lët,  
Villicht hun iwvermorre mer  
En Univäsität.

Schiun morre villicher bekun  
Mer Fenneng wä der Mäst.  
Villicht schiun iwvermorren hun,  
Mer alle wedder näst.

Villicht äs morre Sannescheng –  
En hïsch uch gläcklich Dâch,  
Schiun iwver morre kån et sen,  
Träft es villicht der Schläch.

Näst kån der Mäntscha äm viureos sähn,  
Wat nechstens würde wid.  
Wie wiß, wat morre wid geschähn,  
Wat iwver morre kit.

Ämdåt, Ir Läwen, sedd net fell,  
Und mir erfeallt en Bitt:  
Lott wenichstens doch bäs der well  
Ä Rea mich uch ä Fridd!

## Det wätzich Äk

Wat maocht ijentlich en änglesch Räntner?

A stiht äm Neng af,  
dränkt e Gläs Scotch  
uch gïht zem Golfen.  
Und en franzïsesch Räntner?  
E stiht äm Zähn af,  
dränkt e Gläs Bordeaux  
uch gïht zeä senger Frängdän.  
Cha und en detsch Räntner?  
Die stiht äm Siwen af,  
nit seng Herztopen  
uch gïht än de Arbed!

„Mischi, wat äs en Heilbutt?“  
frocht de Lîhrerän...  
„Dât äs en flach Fäsch...!“  
„Wißt te awer uch waräm die esi flach äs?“  
„Na cha, well die Sex had mätem Walfäsch!“  
„Zem Direktor mät der, awwer esifurt!  
Dô vertêdicht sich der Mischi gânz tapfer:  
„De Lîhrerän steallt ägesi provokant Frojen! Sä häd läwer frojen  
sellin... Waräm de Krued esi griuß Ujen hut!“  
Der Direktor: „...und waräm hut dänn de Krued esi griuß Ujen?“  
Mischi: „Na well e zeagesähn huet!“

Wat äs Läw?

- Det Lächt des Liëwens.
- Wat äs de Frojnder?
- De Stromrechnung....

(ägescheackt vum Martin Lienert)



## Finanzamt

Um Ojnd vum Wirtschaftsjahr schäckt det Finanzamt ennen Steuerinspektor zer Iwwer präfung vum lokalen Spidohl. Wiehrend der Steuerinspektor de Eosgöwen präft, frécht e den Direktor vum Spidohl: „Ech sähn hä, datt Sä en gänzen Hüfen Verbändszech äkifen. Wat mache Sä ijentlichmät den Rästen, dä ze klin sen äm se noch ze benätzen?“

„Geat Fröh“, åntfert der Direktor. „Mer summeln des Räster und schäcke se un den Hiérstealler zeräck, und vun Zegt ze Zegt schäckt deser eas dron eine kosteliusen Karton mät Verbändszech zea.“

„Oh“, entgejet der Inspektor, ewenich entesch drif, af seng eageunlich Fröh en Åntfert ze bekunn. Hië macht awer wegter mät senger penetranten Uërt. „Und wat äs mät desem ägeküften Pfluëster? Wat mache Sä mät diém, wat

iwrich blewt, no diém Sä enen Patienten verpfluëstert hun?“ „Ah cha,“ åntfert der Direktor, die änzwäischen begräffen hat, dat der Inspektor än mät ener Fröh, dä e net beäntfernen kann af't Glatteeß fahre wü, „mir summeln dä Räster und schäcke se zeräck un den Pfluësterhiérstealler und vun Zegt ze Zegt bekumer dron vun desem enen Karton Pfluëster ämsonst.“

„Aha“ soht der Inspektor und duécht ugestrojnt nō, wä hië desen „Ech-wiiß-af-alles-en-Åntfert-Direktor“ doch noch drubekun kängt, und frécht wegter: „Wat mache Sä awer mät all dién Heokt- uch Organrästern, dä no ener Operation ufallen?“

„Na, uch hä verschwände mir näst“, åntfert der Direktor.

„Mir summeln alle des klinizich Heokt- uch Organräster, Feß, Hoind uch wat sonst noch esi ufeallt, und schäcke se dem Finanzamt, und ist äm Johr schäcken dä es drön en komplett Uërschlöch ämsonst.“



Ställ Nuecht...

### IMPRESSUM:

Der MEDWESCHER TRAMITER verstihlt sich als e Bliéd zer Verbriedung vun Froad uch Spaß än easier sakseschen Motterspröch!

**Ereosbroinjer:** Himetgeminschuft Medwesch e.V.; Der irscht Chef: Gökelor Alfred (Freddy), Balingen

**De Steallvertriéder:** Buresch Horst (Mick), Ortwin Rill, Recklinghausen

**Reaktionskollegium Medwescher Tramiter:** Schuster Günther, Nürnberg (verantwortlich) Sankt-Gallen-Ring 198, D-90431 Nürnberg, e-Mail: hg-mediasch@kabelmail.de; Dr. Drotloff Hansotto, Alzenau; Römer Wilfried, Augsburg; Untch Wolfgang, Talheim

**Layout:** Untch Wolfgang, Talheim; Schiller Verlag, Herrmannstadt; Mätarbeder & Logistik: Buresch Klaus, München  
**Erschengd än:** Närrembrich (Nürnberg); Wä oft?: Iest odder zwiémol äm Jöhr als Bäluëch zem Mediascher Infoblatt (awer nor wo geneach Legd, geneach Bädräch äschäcken).

**Dreack:** Alföldi, Debrecen

Schräftlich Bädräch bitte un de Redaktion schäcken. Numentlich odder mät em Signum gezichnet Bädräch steallen de Minung der Verfasser duér und messen net mät diér des Ereosbroinjers iwerinstämmen.

Det Bliéd äs amsonst, awer mer wedden es froan wo Sä eas mehrnor ewenich eangerstätzen, et mess net eabedaingd Giëld sen, awer vill Bädräch. Öf des nea geschriwe sen odder irest feangden, äs allesint.

**Bankverbainjdung:** Sparkasse Fürstenfeldbruck, Konto: 13 04 393, BLZ: 700 530 70,  
 IBAN: DE81 7005 3070 3043 93, SWIFT-BIC: BYLADEM 1FFB

